

10 Minutenpräsentation Rolladenbau Schuhbauer

**I sag Grias Gott habe die Ehr
und wui eich sag´n es freut mich sehr
das i für dUschi eispringa derf
i hoff i kost eich net an Nerv
wenn i an Vortrag hoit´n dua
aufschrieb´m häd i eigentlich gnua
und sResultat vo dera G´schicht
is vo mia a kloans Gedicht**

**I dua eich berichten hob i mia dacht
was a Rolladenbauer so an ganzen Tag macht
ganz leicht is des net a schwerer Job is des scho
in da Früh um halbe sieme do fang ma scho o
do sprech ma dann durch was steht am Programm
wo miaß ma heit hi und wer arbat zamm**

**De oan hom Markisen de andern Rollo
da dritte Reparaturen der is gar net so froh
wei er sehr vui Stellen zu ofahr´n heit hod
und dann san a no zwoa z´mittn drinn in da Stadt**

**De erste Adress san ganz oide Leit
do klingelt er fünfmoi der hern nimma gscheid
und wia er drückt numoi zum Klingelknopf drauf
do macht eam dann da Kunde a scho auf**

**Ja guad das du da bist 30 Jahr is guad ganga
doch gestern do hod s`Rollo zum spinna o´fanga
wia i o´ziag am Strick do hod´s an Scheppara g´macht
und de ganze Bande is oabekracht
und schwar is des Zeig doch oa Frage hob i**

griag i noch de 30 Jahr no a Garantie

**Drauf lacht da Monteur und draht se kurz um
i glab de is seit am hoib´n Jahr rum
da Gurt is schnoi g´wechselt dann fragt er no schnoi
ob er net vielleicht a Angebot wui
gega des ziaig´n do gibt´s an Komfort
i moan a so an Elektromotor
man druckt do bloß auf a Knöpferl drauf
und scho geht der Rolladen no oder rauf
des is vui bequemer hob i mia denkt
ois wia wenn ma wia Katz am Pressack dro hengt**

**Da Kunde finds guad fangt o glei zum lacha
ja kennts ihr mia do a Angebot macha
is gar kein Problem sagt da Monteur darauf glei
des bringt eich dann da Postbot vorbei**

**Und scho geht´s weida zur nächsten Adress
er fluacht auf´n Chef wie heit hod er Stress
wei eam der sovui mitgeb´m hod
dann no da Verkehr wenn´s neigeht in d´Stadt
des is kaum zum schaffa und a net zum lacha
muaß i scho wieda a Überstund macha**

**De zwoate Partie dean grad Markisen montiern
und do braucht da Funk no probiern
dass d´Éndschaltung stimmt wei des war net guad
wenn´s rengt und dMàrkise net eifahr´n duat
a Trinkgeld gibt´s a des is doch a Freid
es gibt hoid doch no nette Leit**

**Auf oamoi leits Handy da Chef der is dro
ob ma net no schnoi was neiflicka ko**

**es dat hoid pressiern wei über Nacht
is z`Vierkircha drauß a Rolltor rokracht
und de Leit de dan gern in d`Arbat fahrn
doch kemas net außa vo da Garage mit ihm Kahn**

**Auch im Büro do geht's furchtbar zua
des Sch....Telefon gibt heit gar koa Ruah
Vertreter stenga an da Tür
de woin a nur ganz kurz zu mia
hätt'n a Angebot speziell nur für mi
d`Frau schreit vo hinten Telefon für di
i schaug me kurz um der Kopf der raucht
drauß steht a Lastwag'n der abladen braucht
mei Handy des leit i her an Moteur nur kurz brumma
de Markisen is zschwar du muaßt ganz schnoi kumma
i nei schnoi ins Auto i merk dass i schwitz
do kummt aufamoi a furchtbarer Blitz
scho wieda Radar i griag fast a Wuat
doch Hörmann Evi hod gsagt des duat am Blutdruck net guad
i denk no ganz kurz bleib locker und wendig
selbständig hoßt net umsonst selbst und ständig**

**Kurze Zeit später is da neieste Stand
de schware Markisen hängt an da Wand
i bin am hoamfahrn und woas ganz gwis
dass bei mir im Büro da Deife los is
6 Kunden warten auf Rückruf es dadad pressiern
es geht um Termine i zermartet mir s`Hirn
wia flick i iataat des wieda nei
eigentlich woit'n Leit am Samstag moi frei
doch a paar muaß i frag'n ob's net doch nochmoi geht
de sag'n a glei zua a nein gibt's do net**

**Um drei gibt's an Kaffe bis en trink is a koid
koida Kaffee macht sche hoffentlich a oid
so langsam wird's stada s'Telefon gibt a Ruha
und wenn i Glück hob kum i no dazua
leg no Rechnungen raus de warn no zum schreib'm
i glab i und mei Frau wern heit no länger bleib'm
und irgendwann is da Dog dann zu End
de ganze Zeit nur buckelt und g'rennt**

**So vageht Tag für Tag und i muaß dazua sag'n
de Arbat macht Spaß i dua me gern plag'n
auch mei Frau hod ma g'hoifa mit aller Kraft
sonst hätt ich des gwis alles net g'schaft
dazua meine Kinder auch de hoifa schon
und nicht zu vergessen mein Schwiegersohn
auch meine Mannschaft de steht hinter mir
dass Kunden zufried'n san dafür stenga mia**

**Mir probiern immer as beste zu geb'm
guade Arbat zu liefern des is unser Bestreb'm
unsa Motto des mia eihoit'n woin
daß ma ois in Schatten stion**

**Um Beschattungen rund um den Wintergarten
ob Plissee Jalousien mia führn alle Arten
ob Kurbelbedienung oder Elektromotor
Dachflächenrollo Garagentor
Zeitschaltuhren Funkantriebe
bei uns wird g'arbat no mit Liebe
is eicha Balkon öede und fad
mia hom Markisen stets parat
in alle Farben blau oder rot**

**und alles meist im Angebot
Auch beim Neubau kennts uns testen
mit schallgedämmte Rollokästen
bei Schräganlagen stell i mia vor
ois Sichtschutz an Lamellenstor
und im Falle eines Falles
i sag mia repariern a alles**

**Iats wißts Bescheid was mia so ois dearn
und soitas moi was negativs hern
dann is des gwiß g'logn und alles net wahr
aber des is eich ja gwiß klar**

**Und seit zwoa Jahr macht´s mia a Freid
Netz zu werken so wia heit
bei BNI fühl ich mich wohl
Steh in da Früha gern auf obwohl
vui sag´n von uns ja scho de spinna
ja nur wer gibt der ko vui g´winna**

**I dank eich iats no für de Aufmerksamkeit
des für eich zum schreib´m es war mia a Freid
falls eich so wia mia geht an schena Urlaub iats no
wei in a paar Stund do bin i davo
14 Tag Urlaub i konns garnet fassen
und nur d´Sonna auf´n Bauch scheina lassen
für de de was arban an schena Dog
recht vui G´schäft des is koa Frog
dass ma uns gsund wieda seng und Freundschaft auf Dauer
des wünscht sich und eich eicha Rolladenbauer**

***Georg Schuhbauer
Rolladenbau Schuhbauer
www.schuhbauer-gmbh.de
August 2009***